

【演說】我上愛唱的囡仔歌

作者：徐堃明

各位評審老師、各位同學，逐家好，我是編號第 號，今仔日，我欲講的題目是：我上愛唱的囡仔歌

阮學校的音樂課毋捌教過囡仔歌，因為阮攏感覺囡仔歌誠幼稚，簡單的節奏，無意義的歌詞，閣愛綴老師攞手扭尻川，佝壁壁。所以，細漢阮攏學彼條江南斯打騎馬仔舞，抑無就是細粒蘋果，一直到拄著一个行毋知路的老師。

彼个老師一入教室就開喙：來，今仔日欲教恁咱人各部位的名稱，頭、領頸、手、胸坎、腹肚...叭啦叭啦...當當阮準備欲抗議的時，伊隨就繼落講：好好，我知我知，綴我唸，齣！又閣是這招，聽著綴我唸若無綴唸，是會予人記烏枋寫聯絡簿仔，逐家只好大聲綴伊唸：你就是排骨仔隊，我嘛是排骨仔隊，胸坎若樓梯，腹肚若水簍，雙支手金光錘，雙支跤草猛仔腿，人人攏叫我是排骨仔隊。欸！竟然共拄才仔教的攏鬥鬥起來，閣誠趣味。唸煞，伊就搖尻川仔花開始唱：你就是排骨仔隊，我嘛是排骨仔隊，胸坎若樓梯，腹肚若水簍，齣！原來是一條歌哦！毋過，這條歌聽起來閣不止仔面熟面熟，有同學開喙就問：老師！這條歌我敢若捌聽過。老師隨就共頭毛辮頭前唱：感冒用斯斯、咳嗽用斯斯...。哦！莫怪哦！原來是廣告藥仔的歌。因為是熟似的旋律，彼改，逐家真正是拼勢學。

毋過，老師嘛誠博古，學歌就學歌就好矣，閣一个仔一个共阮解說按怎胸坎像樓梯，腹肚若水簍，伊講彼是古早時代衛生無好，沃菜用大肥，逐个囡仔腹肚攏生蛔蟲，營養不良，腹肚掙水引起的。猶閣畫圖解說，看甲我強欲反腹；雄雄！一个青狂同學煞問講：啥物是蛔蟲。死矣！老師敢若早就攢便便咧等你，隨就共毒蛔蟲的相片貼起去烏枋.....夭壽！一堆油麵.....。規班無人擋會牢，啍甲厝瓦強欲反去。老師較緊補一句話，恁爸爸媽媽往過就是按呢大漢的，吱吱叫的聲音才慢慢仔坐落來。彼工中晝頓，阮無人食會落飯。

轉到厝，看著阿爸，我隨共阿爸攞咧，目屎四淋垂，那哭那講：爸仔，我知影恁往過佻可憐矣！尾仔，我和阿爸用這條排骨仔隊做主題，去參加社區的親子活動比賽，閣著頭名，一條歌會使共老師學生、老爸後生、舊社會佱新社會攏連結做伙，排骨仔隊就是我上愛唱的囡仔歌。

我的演說到遮結束，多謝。